

帶

經

堂

集

帶經堂集卷八十五

歙門人程哲校編

新城王士禎貽上

蠶尾續文十三

墓誌銘

誥授奉政大夫順天府治中調補兩浙鹽運

司運副錦秋李公墓誌銘

子輿氏有言所謂故國者非有喬木之謂有世臣  
之謂也子謂不盡於此所謂故國者有老成典刑  
之謂也大雅蕩之什曰雖無老成人尚有典刑老  
成人者國之文獻徵焉掌故存焉利害衷焉風俗  
爲之厚頌儒爲之立焉匪細故也若吾鄉錦秋先

生所謂老成典刑非歟先生李氏諱鴻雷字仲默  
錦秋其別字其先自長山徙新城曾祖九青多隱  
德享年九十祖進孝稱李長者享年八十有五父  
采蘭諸生益好行其德享年九十有五 誥封奉  
政大夫丈夫子三人伯鴻震諸生享年九十季鴻  
靈順治辛丑舉禮部康熙甲辰 賜進士出身歷  
官沅江知府先生仲也生而端方嚴介總角能文  
章九歲赴試泰安州父執易其少也試以經義立  
就語多警策咸嗟異稱聖童十二補諸生時文競  
尚諸子其甚者旁及釋典凡南華楞嚴華嚴諸經

皆供漁獵先生心非之獨究心二程遺書朱子語  
類爲文一根於理甫弱冠已稱大師崇禎壬午舉  
山東鄉試 世祖皇帝定鼎急人才徵甲乙科赴  
選人順治二年乙酉授隨州知州隨漢東大郡數  
更闖獻之亂城市爲墟濮州南生魯洙源爲楚轄  
問先生曰隨凋瘵極矣子往何以爲政先生對曰  
布寬大以集流亡嚴警備以弭盜賊其健訟者必  
懲主使以絕根株遺黎其有身乎南公曰善莅隨  
未幾闖賊餘孽一隻虎者擁衆數千將犯隨城虛  
無人衆請避山砦而以城委賊先生毅然不可率

家人胥役閉門登陴發巨礮賊方狐疑進退未決會援兵至遂遁去隨城以全人始有固志未期年盜賊革面流亡漸復汙萊漸闢遠訟者咸悔艾爲良人於是修復學校日進諸生講濂洛關閩之學三年報最中丞御史交薦戊子擢順德府同知時天下初定畿南列郡尚多伏莽會姜瓖以大同叛南趨并汾河東大震邢州距三晉數舍日夜纂嚴先生身任城守露宿睥睨樓櫓間不遑內顧又嚴牌甲譏出入使間諜不得逞如是者累月姜瓖平始解嚴總督尚書張忠勤公能仁亟稱其功署任

縣事均徭役清逋賦吏不敢上下其手舊令候代者三人皆遣之歸遶城壕塹植柳萬株人比於召伯之甘棠時湖南方用兵禁旅日出大名其養馬地也凡大軍所需餼糧芻茭屨槽棧之屬取辦於直隸河南山東道里遼闊不能時至當事者又多畏避不敢前滿漢之情不通往往譟於轅門制府苦之亟召先生計事對曰前此之弊約略有數端立營之所兵民雜處易於生事一也各屬解餼往往不時至兵有庚癸之呼二也運官畏旗軍屯糧之地往往去營闊遠軍苦轉運三也事關三省

而司其事者不過府廳以下權輕而威令不行四也制府曰子往矣是無踰子者先生曰某固言之矣三省之事一府佐何能爲制府曰假子旗牌如吾自行又戒閹吏曰李郡丞代吾理軍需朝至朝以入夕至夕以入先生乃諾而出言於制府豫請主兵者移知旗軍清冊勾稽糧草之數豫示以期某日某旗領某所糧草仍令丁夫如約運至軍營不數日而畢事禁旅無譁者制府勞先生曰古人左畫員右畫方不過如此矣壬辰遷順天府治中先是先生守隨秩滿當遷尉薦之多無出其右者

例得超擢監司太守上官謂先生曷稍委蛇就吏部主者謀之先生不可曰廉吏顧安所得錢至是又秩滿當遷郡守先生復持正不屑詭遇僅遷治中以去人多爲先生惜之則笑曰以龐士元所不能得而吾得之尚何不足之有甲午以順天鄉試收卷舛誤應下吏議而舛誤實在推官監試御史謂先生曰君代他人受過但具一文辯明受事月日吾爲具疏事立解矣先生謝曰與人共事數載一旦涉利害輒反脣相稽君子不爲也御史歎服以爲長者丙申左遷兩浙鹽運司運副代覲入都



疏陳遷海界已來商竈不便者數事雖格於部議  
識者韙之署海寧縣事海寧浙西望縣舊逋積數  
萬前令率預徵新稅爲那移補苴之計先生曰是  
非良法也乃奏記方伯請自今歲十月迄來歲四  
月奏銷之期祇徵舊逋五月後新絲新穀旣登始  
徵新稅民力未絀而新舊不至相奪五年之逋可  
次第而畢策無便於此者方伯曰善行之期年而  
效前令之候代者皆歸南米積弊解役與歇家潛  
通糧道胥吏造假批以完爲欠前令不察往往  
徵解至再三民無所告訴先生廉知之乃定爲官

收官解之法刻石縣治吏役不得復肆其奸每歲  
漕糧官胥居爲奇貨旗軍挾之恣其需索莫敢誰  
何先生力除其弊絲毫無所染指旗軍斂手奉法  
比代歸不名一錢海寧膏腴之地甲杭諸邑而先  
生處之澹然清操益勵人以爲尤難尋署嘉湖道  
事值歲祲而禾郡市河久湮塞商賈不至先生乃  
力任濬河而設粥廠於河干飢民就食者因而募  
之咸踴躍趨事閱月河工告成民無流冗商賈復  
通先生之幹濟皆此類也壬寅以閩餉解不及額  
罷歸巡撫已下惜先生才將特疏題留先生不可

曰兩親年踰七十恒思歸養而苦限於例今獲省親膝下幸矣敢復戀此雞肋耶歸田三十餘載布衣蔬食坦步當車弟沅江君官郎署長子嗣真以庚子領解丁未成進士家門方鼎盛而門庭蕭寂不啻單素晨夕定省而外出則課耕田間與蓑笠爲伍入則危坐讀書不爐不扇若未嘗從大夫之後者然縣有大徭役大利害必援據典故侃侃爲長吏陳之縣處章鄒淄長諸水下流歲罹水患先生著平心說巡撫中丞桑公采而行之西北水患得以漸甦此先生爲德於鄉之大者予嘗論之先

生廉吏也仁人也廉而不劌故其行一本於忠厚而不爲谿刻仁而有勇故平居退然自下一旦投之以艱鉅而不畏不疑里居言行皆可師法以身爲鄉之文獻者數十年古所謂三老五更者也老成云亡典刑日遠能不爲人心世道之憂乎生以萬曆甲寅六月十五日卒以康熙三十四年乙亥十二月十五日享年八十有二積階至奉政大夫元配高氏長山人也莊靜勤儉與先生同德事舅姑以孝佐夫子以儉教諸子以嚴撫臧獲以慈終身不御紈綺不知金翠之飾身旣貴猶躬操井臼

至於白首生以萬曆甲寅九月初六日卒以康熙四十三年甲申四月十九日享年九十有一累封宜人子六人嗣貞順治庚子解元康熙丁未進士卒嗣貞歲貢生候選訓導卒嗣慎卒嗣恭增生嗣讓增生嗣武庠生女一人適增生何毓光孫七人德洽增生德祺德祥德寬德宣俱庠生德祚卒德泌孫女十三人曾孫七人依謙依訓依訪依諧依信依中依禮曾孫女七人五世孫一人廷芳五世孫女一人先生以康熙己卯十月十日葬潘孟店祖兆而隧道之石闕焉今以高宜人祔實丁亥十

二月二十四日銘曰

昔有先正兮言明且清猗嗟先生兮國之老成國  
之老成兮世爲典刑掌故攸稽兮文獻足徵天不  
憖遺予梁木以傾丸丸松柏兮棲神之庭東王西  
母兮體魄攸寧九原可作予先民是程

新授徵仕郎內翰林秘書院檢討豹岳唐公

墓誌銘

鄭子皮死子產哭之曰吾已矣無與爲善矣古賢  
士大夫砥志節厲廉隅身在朝廷之上則危言危  
行退居里閭則不言而躬行使其長吏有所矜式

其子弟有所勸而爲善有所畏而不敢爲不肖流風餘韻猶將百世師之而沉於親炙之者乎此吾於翰林唐先生之歿而不禁子產之悲也按狀先生諱夢賚字濟武別字豹岳其先以軍籍來淄川曾祖思仁祖士卿父曰俞字彥開名儒也先生幼穎悟以父爲師童子時私學爲古文鄉先生刑部侍郎高公珩見而奇之曰異日當以文章名世弱冠舉順治五年鄉試明年舉禮部 賜同進士出身改庶吉士八年授秘書院檢討會 命翰林院譯文昌化書先生慨然曰此非聖之書豈可塵 乙

夜之覽乃具疏大略以爲曲說不典無裨聖化請移此以輯聖賢經世大訓以佐平明之治疏入留中九年請急歸葬行有日矣會御史張某以外補上疏反噬干重典給事中陰某壽張爲幻押閣其間先生惡之上疏糾給事中忤要人意遂罷歸王文通公永吉過先生曰此固吾輩意中事也愧公勇決多矣於是李詹事呈祥蘇給事文樞諸編修豫各有疏直先生而先生徑拂衣歸先生之歸也年未三十侍兩親就養無方審燥溼問燠寒終身無欠伸跛倚視異母弟夢師如手足疾痛苛癢恒



與其之爲營別墅而代任其租賦鄉人化其德慕  
侍郎高公之爲人遂卜鄰焉布衣芒屨相與嘯咏  
溪山之間里中稱曰二老居恒讀書稽古講伊洛  
關閩正學以其餘旁通二氏凡柱下西竺微言奧  
義皆能窮其指歸發爲文章世間世出左右逢原  
若懸河決溜一息千里而莫之能禦也論詩以蘇  
陸爲宗跌宕排奐上軼旁出予嘗序之以爲其文  
近於蒙莊其詩近於東坡識者亦不以予言爲妄  
也旣以大宅讓其弟而卜築城之東南隅王樵蘭  
室舊地中有志壑堂林臯閣畫餘亭莊山書屋地

縱橫不數十笏修竹高梧曲折蔽虧小山曲池逶迤映帶先生自爲賦以道其意又仿雲棲放生池遺式於城西傅家灣二水匯處作放生磯數里上下網罟絕跡與高公賦詩刻石以垂永久先生雖蕭然世外而不忘經濟著銅鈔疏禁糴說備邊策皆鑿鑿可見施行尤加意桑梓如議革簽報櫃書籌省漕糧折解免西郭義集起稅皆請於縣令力舉行之縣人食其利者二十餘年中年遊廬阜龍眠浮渡下姑蘇泛濤江登嚴陵釣臺登臨之餘或爲道人裝攜一杖施藥於市人不知其故史官也

客武林同年林副使嗣環前已客死有子壯不能娶先生傾橐爲營葬授室手錄其遺集以歸平生高義多此類雅好汲引後進經其指授率成名士取科第如蘇元行譚再生楊萬春輩甚衆先生篤於朋友數百里巾車往返不以爲勞予乙丑夏以祭告歸自東粵先生與高公訪予西城別墅夜涼坐石帆亭劇談江東山水丙夜不休丙子秋復以祭告歸自秦蜀高公已老病先生獨訪予御書堂流連投轄三日不忍別先司徒先夫人之喪先生不遠百里所以弔唁之甚至先兄考功之器

先生哭寢門極哀予兩服闋詣京師先生先期過予上下千古凡經世出世經史百家之學無不往復極論嗚呼世豈復有如此人哉在禮有之曰州閭鄉黨稱其孝兄弟親戚稱其慈執友稱其仁交游稱其信于先生備之矣先生襟情曠達預營生壙煥山之陰侍郎高公爲之誌所著志壑堂集二十四卷後集八卷選集十四卷則予所論定也又濟南府誌二十四卷淄川縣誌八卷借鶴樓小集二卷林臯漫錄若干卷生明天啓丁卯十二月八日卒康熙三十七年戊寅六月十六日元配畢

氏有壹德 皇贈孺人繼配焦氏戶部左侍郎毓  
瑞之妹子一人行學歲貢生侯補京職女一人適  
范祖光孫一人伯珍以其年十二月二十一日葬  
來請銘銘曰

惟昔君陳惟孝友于兄弟克施有政先生之出官  
爲詞曹而著名諫諍先生之處令德孝恭而不忘  
利病學兼二氏而著書立說必軌乎先聖文擅作  
者而感物吟志必晰乎雅鄭鄉國典刑人倫水鏡  
身則已矣名則益亶後之人過丘墓而式之曰我  
有先正

誥授朝議大夫福建分守督糧道布政使司

叅議慙蓼劉公墓誌銘

公劉氏諱深字源長別字慙蓼世爲淄川人曾祖  
爵祖冠父鼎鉉公幼從父學無他師年十六出應  
童子試督學鄞人錢君清溪試以經義三篇頃刻  
立成文采斐然大奇之補縣學生宣城施愚山侍  
讀以僉事來督山東學六郡英九之士甄拔無遺  
賞公文以爲蕭疎簡遠拔冠其軍順治庚子省試  
主者將以公首解旣而以新城李嗣真作元同經  
房移置第六李君公受業弟子也榜發傳爲盛事

康熙甲辰嚴我斯榜 賜同進士出身癸丑銓授

香河知縣香河密邇京師地久爲八旗屯牧其民  
皆宗室佃人公嚴立科條不畏強禦旗人凜然亡  
骫法者縣西四十里爲河道通津會滇閩作逆

朝命禁旅往討浮戈船南下公慮民失農時且不  
任挽送之苦多方籌畫募市井丁壯代之事嚴而  
民不知役治香河三年惠政不可殫紀民尸祝之  
比於畏壘擢行人司行人康熙庚午典廣東試得  
梅遇夫等四十三人拔潘君履生於廢黜之中士  
論服之辛未考選臺諫 特簡湖廣道監察御史

公之官行人也與陽羨任葵尊弘嘉居同邸舍出入共一肩輿不謁權要不通賓客茗碗鑪熏討論經史相對晏坐終日而已至是兩人同授御史任君章數十上而公言不妄發務鎮靜持大體尤不樂搏擊爲名高時司農籌餉頗開事例賈人子入貲或加至一二品每朝期章服爛然尊卑亡等公上定品級以崇國體疏下部議言雖不行識者避之甲戌外補福建布政使司叅議督糧儲閩海疆也將軍已下提鎮綦布滿漢兵戍守者八萬有奇胥待哺焉公殫心經理給無後時嚴絕扣剋積



樊軍皆宿飽馬騰於櫪林某者有塋地一區爲豪  
民兼并前讞者多入其賄不與直最後赴愬於公  
公親履畝得斷碣田間披薜繹之果林氏祖墓也  
遂以地歸林而置豪于法凡其虛公明斷皆此類  
未幾引年乞休歸林居數載不飾輿馬不入州府  
長吏罕覲其面可以厲士風敦薄俗禮所謂歿而  
可祭於社者公其人與生天啓丙寅閏六月初三  
日卒康熙四十二年癸未十二月二十九日享年  
七十有八階朝議大夫歷官湖廣道監察御史福  
建布政使司參議元配翟氏封孺人性嚴毅有烈

丈夫風公宦游四方孺人獨操家槩未嘗之官督  
治田園勸課紡績歷年賦稅不待追呼而畢率取  
給于家而不仰給于官故有以成公之廉正教子  
讀書取友皆爲名士師巫尼媼罔敢履闕生天啓  
甲子十二月二十五日卒康熙四十六年丁亥七  
月初九日享年八十有四子男子三人肇徐縣學  
增廣生肇昌縣學廩膳生壬午副榜肇祉早殤  
女子四人傅思明韓貞吉王朝相高之隲其壻也  
孫男二人紹祖繩祖孫女四人以丁亥冬十一月十  
七日葬縣城東北之田家莊肇昌從予游來請

銘銘曰

鄉之善士國之寶臣仁而不鷙爲時鳳麟六廉四  
知砥操松筠三德六行燕詒子孫峨峨德配敬姜  
比倫眷壽偕老蘭玉詵詵黌黌山嶙峋孝水清淪封  
如馬鬣松作龍鱗不騫不崩裕爾後昆

誥贈光祿大夫刑部陝西清吏司主事御之

宋公墓誌銘

順治癸巳甲午間予爲孝廉始出交天下士與吳  
郡諸子通縞紵之好時則三宋爲之職志三宋者  
御之先生及其兩弟文恪公右之孝廉疇三也明

年乙未予上公車與文恪同舉禮部而疇三暨雲  
客旣庭茗文原一公肅甫草皆湊京師後二十三  
年丁巳而御之始舉京兆又二十年丙子予以祭  
告西嶽再使關隴公冢子僉憲君適知商南縣與  
予爲城南之遊信宿樊川敘述疇昔欣慨交心又  
十年而僉憲持節來濟南以公誌墓之文請回憶  
訂交之初已五十餘年而予亦耄及之矣其何忍  
不銘按狀公名宓初名德寬改名德宸最後改今  
名字御之別字儉齋世爲蘇之長洲人高祖純仁  
南京刑部山東司郎中曾祖道明太學生祖琦諸

生 皇贈資政大夫兵部尚書父學朱崇禎辛未  
進士監察御史出按山東戊寅殉節死卹贈大理  
寺卿 皇贈資政大夫兵部尚書公其冢子也少  
與兩弟讀書家塾已露頭角十四補諸生會侍御  
公殉節訃聞公哀號奔赴崎嶇戎馬間比達濟南  
兵亂後暴骨如莽公以孤童晝夜行求哀動行路  
及終不得乃招魂返葬江南人稱篤孝家難之後  
風雨漂搖公與兩弟入而侍母出持門戶以其隙  
下帷聚書讀之兄弟自相師友文名藉甚吳越之  
士珠槃玉敦交錯於道衣冠文物之盛傾動東南

順治戊子辛卯兩弟相繼捷去公喜曰是可以承先志慰吾母矣不以己之不遇而有愠色乙未文恪成進士留京師疇三南歸未抵里而太夫人病終於家公子然獨治後事必誠必信勿之有悔先是公文章與兩弟齊名已而文恪官禁近日益通顯疇三早歿而公數奇不遇丁巳始舉於京兆則公已老矣甲子畿輔災時僉憲君知真定之臨城公質產得千金公車攜之而北過臨問民逋尚六七百金公出橐中裝命僉憲代完之戒勿責償臨人皆感泣瀕行語僉憲曰今歲饑來春且艱食憂未

艾也吾橐中尚餘金三百當悉留備賑民食新麥  
乃已僉憲謹受教全活者數千人臨之父老子弟  
感公恩德爲立祠請於上春秋祀焉嗚呼以公之  
文學才略使得早達自奮於功名之會必能廉平  
清靜以經術潤飾吏事使民安其田里亡怨苦愁  
恨之心如兒寬董仲舒之爲者而僅小試於臨城  
之一邑是可歎也丁亥之秋濟東諸郡縣大水歲  
稔僉憲立爲請命請蠲不已重以請賑夫亦猶繼  
公之志也莊子書稱庚桑楚居畏壘之山三年而  
畏壘大穰其民相與尸而祝之社而稷之公身雖

不遇而能以臨與濟之民爲畏壘亦旣尸而祝之  
社而稷之矣又何憾哉公居鄉里恭謹儉約不啻  
後門寒素文恪嘗曰吾仕宦三十年常懼得罪鄉  
鄙能助成之者吾兄力也是可以知公已矣公少  
以文章風義知名江左晚歲家居四方人士負笈  
從遊者益衆予不具論論其利濟及人之大者使  
後之人知公有用世之才而終其身不獲一遇爲  
可惜而區區文藝之末不足以盡公也所著存笥  
稿四卷玉壺堂詩集六卷藏於家生以天啓乙丑  
八月初九日卒以康熙丙寅十二月初二日得年



六十有二元配管氏遇 覃恩例封文林郎直隸

真定府趙州臨城縣知縣妻封孺人辭不受 誥

贈光祿大夫刑部江西清吏司主事妻封一品太

夫人子男子三人廣業即僉憲君見任分守濟東

道兼理通省驛傳山東按察司僉事定業浙江紹

興府知府嗣為疇三公後紹業安陽縣知縣子女

子四人一適己卯舉人吳諶一適教諭葉舒球一

適教習江之訓一適太學生金之法撫疇三女一

人適教諭丁棟孫男六人志益候補主事師曾戶

部陝西清吏司郎中志蔓候補主事志契候選訓

導志尹志祁俱太學生曾孫四人允熙允文允恭  
允讓以某年某月某日葬某阡系之銘曰  
應龍乘雲霖雨天下叶戢翼淵潛而活彼涸魴房  
子之人伏臘奉祠公之神氣則無不之

誥授朝議大夫提督廣東學政按察使司僉  
事赤山于公墓誌銘

公子氏諱覺世字子先別字赤山其先文登人有  
仲德者徙新城是爲新城始祖三傳至璧中順天  
壬午鄉試歷官福建道監察御史巡按河南湖廣  
以廉直聞官至苑馬寺卿曾孫承慶知武安縣公

曾祖也太學以讚公祖也贈朝議大夫振翼是爲公父朝議大夫五子長維世博物負奇氣一時名士交推讓之公稍後出與之齊名中順治三年丙戌鄉試乙未舉禮部尋丁外艱己亥賜進士出身授歸德府推官未幾奉裁改知巢縣縣古居巢帶山瀕湖號難治公爲政寬簡間以嚴劑之獄訟衰止俗好巫尚鬼壬子冬縣人數夜驚晨起則院中多得瓦石民間競爲祈禳公曰此奸人所爲何城狐社鬼敢爾乃下令嚴緝三日而獲其作奸者某某置諸法人心乃安庚戌江北饑居巢尤甚公

捐俸錢購米以食飢者存活數萬人明年蝗公齋  
戒祭禱遂不入境巢人頌之癸丑滇寇發難親  
王帥大兵入楚休士馬於廬州糗糧芻茭屢屐咄  
嗟取辦太守走匿他所曰是非巢令不可檄公至  
悉以委之公立啓於王戢禁旅勿譁出則頤指  
口畫日中皆集無後時者按籍而給之王大喜禁  
旅皆悅旣歲事太守謝曰微公才略不及此有巨  
寇宋標者抵巇起安廬間衆數千人攻剽郡邑將  
據焦湖爲窟穴揚帆自大江東下公偵知之設伏  
於南門浮橋而身率甲士邀擊之甫接戰伏發殲

其衆魁就禽上功幕府餘黨皆烏獸散安廬之盜  
遂絕根株公之力也內遷刑部主事歷員外郎遷  
禮部郎中辛酉奉命典試兩浙得人爲盛明年

壬戌蔡君升元狀元及第即公門下士也尋出視  
學廣東東粵當兵燹之後廟學多圯敗公首請於  
督撫疏請修葺得旨允行其教士先德行後文藝

士翕然化之瓊州遠在海南前學使多憚風濤不  
至公叱馭而往舟至中洋颶風作舟中人皆恐俄  
有小鳥狀如鸚鵡來集檣上舟人懼譟徑渡得無  
恙論文之暇廉問忠孝節義關教化者悉旌之三

年報最擢布政使司參議需次歸以繼母王太恭人春秋高絕意仕進晨夕定省寢門如孺子然鄉黨稱孝焉辛未太恭人八袞率家人上壽觴甫行而疾作生萬曆己未八月初四日卒康熙三十年辛未二月二十九日得年七十有三所爲詩有居巢使越嶺南諸集藏於家元配李氏繼許氏又繼王氏皆前卒治行先後相望而王相公最久子女皆其出子男子二人允勗歲貢生允昱兵部職方司督捕主事子女子一人適子姪啓浣前卒孫男二人履乾履坤曾孫男一人崇勳系之銘曰

文足華國武能戡亂逸氣卓犖丰容魁岸夏屋之  
封彤水之畔生氣如存千秋遐算

誥封戶部廣西司郎中貞文龐公墓誌銘

公龐氏諱克慎其先延慶州人隸大寧衛軍籍明  
永樂中以衛地賞邊人內附者徙屯畿輔郡縣始  
祖永資以百夫長受田河間之任丘縣遂爲縣人  
三傳至松壽一百一歲稱百一公是爲公曾祖生  
泮官東光縣教諭泮生招俊諸生兩世皆以尚書  
名其家是爲公祖父母曹氏有大節死崇禎壬午  
之難公始爲諸生哀籲當道得上聞列祀典公天

性至孝友于兄弟將析產盡讓膏腴不取而自擇其礪确者旨甘之奉則身任之不以責兄弟至於器葬之禮亦莫不然宗族鄉黨歸義焉公家世受尚書著尚書傳習錄及藝苑歸約諸書迄不得志于有司以諸生終老子建寧君塏康熙乙卯舉鄉試己未登制科入翰林公以 覃恩誥封徵仕郎翰林院檢討已建寧君改官郎署公再以 覃恩誥封奉政大夫戶部廣西司郎中乃一解顏謂建寧君曰吾老子縫掖今乃榮梯再命無以報 國恩小子勉之以清律己以愼勤服官所以報也歲



戊寅君以久次出守建寧便道過家公勗之曰專城之任可以有爲爲政非難清靜爲上拂百姓以從己欲不可違道以干百姓之譽亦不可潔身奉公盡其在我而勿計得失如是而已君之得建寧也閩有大吏素不喜文士比至果相杓鑿甫二載竟以計典齟齬去官辛巳歸里公怡然曰吾不愛汝以墨敗行而常憂汝以直賈禍今以微責歸田里幸也是時公年八十有五矣明年十月朔示疾君兄弟請延醫弗許曰老當歸耳勿以湯液苦我以十一月朔寂然而逝距其生萬曆丁巳得年

八十有六元配邊贈宜人繼王封宜人子四塏即  
建寧君前翰林檢討戶部郎中礪庠生璽選拔貢  
生候選教諭皆太學生女三適邊之鎮李鈺邊之  
基孫男四錫禎錫祥錫祚錫祺公行爲國紀學爲  
人師爲里鄙矜式者數十年及以耄耄考終下至  
田夫賈豎皆出涕相弔私謚曰貞文先生以癸未  
二月某日葬于某阡建寧君書來速銘銘曰

襄陽耆舊漢有龐公屏居漢沔心寄冥鴻孰拜  
牀下鳳雛卧龍歷千餘年公繼高蹤遺子以安世  
仰素風眉壽大耋逍遙令終問誰與游桂父赤松

吾丘之原高碣穹窿松耶柏耶衛此幽宮

誥贈奉直大夫陝西寧羌州知州慧先石公

墓誌銘

石先生歿五年而其子平涼太守曰琮始登進士  
又十年以 覃恩追贈先生陝西寧羌州知州曰  
琮將以康熙四十四年冬十二月祔母張太宜人  
於先生之故阡來徵銘於是距其葬十有九年矣  
先生諱顏字慧先其先棗強人始祖獻明仕至汝  
寧府知府徙居長山曾祖朝陽祖如金父載勛皆  
績學不仕先生少而食貧拾橡負薪讀書不輟屢

遭父母繼母喪蔬食水飲緇衾複衣飾牆置嬰舉  
無敢略若自忘其貧也故君子以爲難先生旣不  
得志於場屋而有子曰琮幼敏於學先生身教之  
指授爲文之法闡明經書奧義晨夕忘倦久之遂  
成名士洎曰琮舉省試舉禮部而先生已不及待  
曰琮言之則淚下承睫恫乎有餘悲焉先生正直  
坦白口不言人過而急人之難甚於己私家無僮  
石之儲遇無告者輒推解如不及故鄉里敬愛之  
安貧樂道不戚戚於貧賤不汲汲於富貴可謂居  
易俟命之君子矣旣歿神降於庭自云爲神於淮

北之桃源事頗涉怪異然韓子作羅池廟碑述柳侯之言曰吾死爲神後三年爲廟祀我館我於羅池君子不以爲誕先生天性正直好爲德於鄉里殆傳所謂歿而可祭於社者於理宜可信卒年六十有四元配孫氏繼配耿氏皆以 覃恩贈太宜人繼配張氏而曰琮孫出也張太宜人撫育有恩自授室以逮服官顧復教誨靡不至曰琮知新鄭縣清勤爲中州第一五年之內累膺 朝廷異數峻擢知大郡蓋張太宜人母教爲多男子四人曰琮康熙辛未進士陝西平涼府知府加二級曰璟

曰玠曰璐皆貢監生女子四人適王履吉崔琨孟  
銓鮑巽孫男三人聲宏歲貢生天爵天祿皆貢監  
生孫女七人曾孫一人曾孫女二人銘曰

不於其身於其子孫綸綍煌煌賁於墓門譬豫章  
千尋厥有本根譬彼方流厥有璇源維萬石之源  
詒爾後昆

帶經堂集卷八十五

帶經堂集卷八十六

歙門人程哲校編

新城王士禎貼上

蠶尾續文十四

墓誌銘

誥授中大夫福建提刑按察使司按察使清

止趙公墓誌墓

康熙三十八年六月春坊贊善趙君伸符以書抵  
予曰從祖父清止府君葬有日府君病且革治命  
乞先生銘隧道之石今既八年矣敢請昔公之歿  
予在京師未及哭寢門今贊善君將治命鄭重千  
里以書相屬不佞其忍辭乃据贊善所爲行述序

而加銘公諱進美字凝叔一字韞退號清止其先  
蒙陰人始祖平徙益都始卜居顏神鎮七傳至龍  
溪公課 皇贈中大夫陝西布政使司叅政公之  
祖也父暨垣公諱振業中明天啓乙丑進士仕爲  
御史累官江南布政使司叅議 誥封中大夫陝  
西布政使司叅政母李氏封淑人公幼具夙慧讀  
書有神解帖括之暇輒私作爲詩歌古文人稱聖  
童十四補博士弟子十五學大就自左史兩漢唐  
宋六大家之文皆已窺其堂奧發爲文章老師避  
席十七中崇禎丙子鄉試第一又四年庚辰成進



士授行人奉使江西寧益二藩府值甲申之變僑居金陵轉徙吳江之汾湖順治乙酉亂定北歸會

世祖章皇帝下詔直省撫按薦舉地方人才公在舉中 召授太常寺博士博士冷曹無所短長而

公負文章盛名都人士負笈從游甚衆今大學士宛平王公故吏部尚書謚恭定霸州郝公皆高第弟子丙戌充順天同考試官得金侍郎鉉李學士昌垣等六人庚寅以才望推擇爲刑科給事中公居言路不爲矯激不樂彈劾立言本經術務持大體若 北郊奉配及籍田祈穀諸典禮皆所請也

辛卯頒 詔山西癸巳遷戶科右給事中甲午轉  
禮科左給事中典湖廣鄉試得程飛雲歐陽鼎等  
多奇偉之士丙申出爲江西按察司副使分巡湖  
西道江右新附吉安之永豐及臨江之新淦峽江  
贛之興國素號盜藪公刺姦發伏得其要領言于  
巡撫張中丞朝璘盛兵扼賊要害而馳檄招之賊  
倉卒遽降乃官其酋長數人解散其衆未幾海寇  
犯江寧沿江皆纂嚴彭蠡以西人無固志守令  
以下請爲備公曰海寇之不能飛渡彭蠡明矣顧  
山賊乘間虞竊發第防之乃陰部勒將士不數日

賊果寇永豐公日莫聞警夜遣兵赴之戒以詰旦破賊明日合戰大敗之禽其魁得前降酋官南昌者交通狀馳白巡撫悉斬之會江寧圍不解巡撫徵諸郡兵戍湖口公慮吉安空虛而興國賊未被大創勢且與永豐新淦峽江餘黨合奏記南贛巡撫蘇中丞弘祖請發勁卒五百人順流趨吉安至之明日興國賊千人掠廬陵之富田殺一巡檢僚屬請往援公不聽曰是將走永豐山中耳命偏將將贛兵入山邀之行鳥道三日果遇賊乘曉霧薄之賊出不意大驚潰顛墜崖谷禽斬亡算盡奪其

俘獲於是興國永豐新淦峽江四縣賊次第悉平  
初贛江盜賊縱橫殺人于城下白鷺洲既捕獲僂  
之矣惟李毛者逸去適安福兵餉三千金被劫江  
中久不得盜公偵知李毛匿處密使禽之既至毛  
搏顙請貸死願捕諸盜自贖許之與約三日或言  
毛黠賊反覆不可信公笑曰是不負我諸君勿疑  
三日毛果以主名至悉按捕就誅既而毛請問曰  
不殺盜魁後恐滋蔓奈何公問誰也曰南贛營裨  
將郭某也公密遣壯士數輩易服入贛州禽之于  
家而先以書上蘇中丞謝越境之罪一軍皆驚卒

無敢譁者公訐得實按誅之於是贛江無盜患張  
中丞上公功于 朝方議內遷卿寺而賊帥萬雲  
龍者前攻破吉水新喻二縣既獲復逸坐是奪公  
俸越二年弋獲于粵而內遷之議遂寢庚子轉廣  
東布政使司叅政分守左江道甫抵肇慶防兵以  
缺餉大譁公單騎至其營諭禍福衆遂定會藩伯  
缺督撫將以屬公公念父母老矣亟圖北歸省覲  
力辭以齎表請行而左江道尋裁去里居侍養者  
五年乙巳起補陝西布政使司叅政分守關西道  
駐鳳翔鳳翔故有蘇公東湖爲八觀之一公日嘯

咏其間務與民休息尋復奉裁遂里居養親不出  
叅政公與李淑人年皆踰八十考終公執喪盡禮  
甲寅滇逆發難閩粵繼煽動公慨然曰此豈臣子  
避險辭難時耶出補江南江鎮道叅政改浙江之  
杭嚴會軍前題補有人丁巳改河南布政使司叅  
政分守河北道是時大兵四出彰衛懷三郡當子  
午供億紛然公夙戒儲侍民不知勞戊午 詔舉  
博學鴻儒內閣首推薦公徵詣 闕公自惟宿素  
恥與後進爭尺寸卒報罷歸巡撫董中丞國興重  
公爲人恒稱先輩不敢出屬吏也署臬司事安陽

民受僞劄株連甚多公當其首罪全活者三百餘人壬戌擢福建按察使閩當叛亂後大獄旁午公畫評囚夜定爰書三月囹圄一空獄無冤濫閩人歌舞之護巡撫篆寬大有體而金侍郎來爲巡撫公謁之外語不及私甲子引年乞骸骨遂致政歸歸治園亭于城東之秋谷丘壑勝絕泉水遶舍下幅巾藜杖相羊其間如是者八年以康熙三十一年十二月初五日卒于里第得年七十有三配張氏贈淑人前總督宣大兵部尚書張公曉之孫靜默有壺德以順治十六年卒吉安官舍年三十有

六與公合葬虎山之阡葬之日康熙三十八年己卯九月二十四日也子一作謀官監生候銓國子監典簿前卒女子二適翟恂呂炯孫一執璽官監生公少爲詩清真絕俗得王孟之趣使江西時尤刻意二謝其放吟一卷皆樂府詩丁明末造多悲天閔人之思顧盼跌宕不主故常有邯鄲生天人之歎丙戌後官京師與龔芝麓尚書曹秋岳侍郎諸公倡和一變而高華尚聲調然梨花楓葉諸篇風致不減青丘海叟使楚一集尤爲菽林所貴重江西以往浮湛監司者積三十年公旣倦遊而筆



墨亦奇減早通二氏之說髮未燥作瑤臺夢立地成佛諸傳奇論者謂不減張小山貫酸齋云公清癯如不勝衣雙瞳碧色吐納無俗語一爲諫官斥而不復世皆惜之其斥也或云以黨論故公終不自言子亦不欲顯言之也系之銘曰

公之早歲爲真名士綜敘九流沈酣六藝公之中年爲真諫官衆皆毛鷲我乃龍鸞坐鎮雙江折衝千里緩帶輕裘似羊叔子角巾東第飛蓋西園圖畫屏風似白樂天公之出處如雲舒卷貞觀丘壑孰云軒冕瀧流舒舒顏山叢叢於萬斯年奠此幽

宮

誥授朝議大夫貴州布政使司叅議古愚勞

公墓誌銘

公姓勞氏諱倣融字卷星別字古愚嘉興石門人其先世受封於勞山因賜姓晉功曹夷與王謝蘭亭之楔宋兵部尚書修策勳南渡迨元有原誠者官崇德州學錄家焉即今石門縣也數傳至珩珩弟玘明成化朝官給事中以直諫忤旨自珩以上世居洲錢里玘子經贅安垵里遂徙居之子鈇鈇子源源子王事贈福州府知府子金粟公諱永嘉

累仕至山東布政使司左布政使金粟公三子公  
長也母張氏封恭人生母高氏公少事父母至孝  
與弟倣高倣朗相友愛叔早世公與仲兄弟皆年  
臻八十歲時伏臘冠婚祭祀兩老人必身先之鄉  
里以爲典型少爲文章高古不諧俗申酉以後罷  
制舉力爲善於鄉先是崇禎壬午浙西大祲斗米  
至白金四錢漕不及額公率兩弟括倉庾得米八  
千餘石盡輸之官補一邑荒缺無徵之數全活亡  
算內外嫻黨待以舉火者尤衆無德色居恒教子  
以文行輒舉金粟公遺事爲訓子通政君之辨甲

辰登第改庶吉士歷戶部主事員外郎禮部郎中  
公誠之曰若攻苦歷幾寒暑以有今日他日儻司  
文枋慎毋過抑孤寒昧本來面目乙卯通政君主  
江南試公慎自矢得施震銓等六十三人皆宿素  
知名之士丙辰以僉事出督山東學政益絕苞苴  
拔寒畯會有減額之令凡繩樞甕牖久淹場屋者  
一時題拂殆盡其最知名如汪灝趙執信馮廷樞  
畢世持張埴趙泰姓輩不可更僕數論者謂本  
朝四十年來視齊魯學者前有戴京兆京曾施侍  
讀閏章與通政君鼎立而三而通政當減額之日

所爲尤難會魏敏果象樞爲御史大夫毅然以揚  
清激濁爲己任特疏薦學臣二人以風天下之辨  
暨江南學使邵嘉也舉朝清議翕然以爲允旣而  
邵君內擢光祿寺少卿通政厯以例遷人多搤擊  
公怡然曰小子能得魏公一言足矣內外皆王臣何  
擇焉庚申寇孽據滇黔大兵次湖南進勦貴州巡  
撫楊中丞雍建以糧驛道請得旨推擇乃以通  
政君往時諸道兵雲集黔爲孔道芻粟靡屢咄嗟  
何辦會有楚米運黔之令自鎮遠至貴陽輓運丁  
夫逃斃接踵復議湖北丁夫協運通政君力言湖

北之夫不必派湖南之運可以停無如黔地採買便中丞據以入告楚運遂罷水西爲安氏世業康熙初改土設流官置平大黔威四鎮四郡統之額徵秋糧歲四萬石供軍糈滇亂後民流田荒缺額至二萬石有奇通政君力請蠲除中丞疏再上得旨報可先是金粟公在明代嘗官黔其官齊魯歷諸監司洊至藩臬之長歲月益久所至見思至是通政君繼之黔人洎齊魯士大夫皆曰此勞公孫也吾儕乃世食其德蓋公夙昔所舉以爲訓者至是乃大驗公慈儉出天性仁義道德不言而躬

行恒揭慎獨二字座隅自言我一生肺腑如雪將  
易簣子孫環侍惟以忠孝爲訓語不及他旣歿鄉  
人皆出涕相弔曰是五十年前助漕活我數萬戶  
者其感人如此生萬曆壬子六月二十七日辰時  
卒康熙三十四年乙亥正月二十八日戌時享年  
八十又四累遇 覃恩 皇贈朝議大夫貴州布  
政使司叅議元配沈氏刑部德先女白首相莊六  
十載多壺德娣周氏忠介公順昌女潘氏中丞公  
曾紘女皆出名家恭人與之雍睦無間言如公之  
所以友其弟者幼通孝經小學內則諸書曉其大

義教通政君兄弟皆成立生萬曆壬子五月十三日辰時卒康熙二十六年丁卯七月二十四日申時享年七十又六累封恭人子七人祖勳庠生之純副榜之辨康熙甲辰進士由庶吉士歷官通政使司左通政之芳之裕州同知桓太學生之森太學生女子十二人適某某孫十三人曾孫七人系之銘曰

維勞之先以山命氏姚江語溪波瀾莫二逮方伯公其流益沛佑啓後人公實繼志榮期三樂俯仰無愧子爲名卿爲古廉吏公之榮名施及百世特



書堅珉以告來裔

誥封中大夫通政使司左叅議訥菴錢公墓

誌銘

往者通政再亭錢君與子共事西樞每見罪人株連繫累者輒愀然形顏色往往出己貲贖之予心折久一日語君曰公誠仁人長者也君斂容避席曰主臣此家大夫之教也自是略悉尊人訥菴公行事旣而君遷通政再請急歸而訥菴公捐賓客通政君書來使銘隧道之石嗚呼予仰止公舊矣雖固陋無能爲役其敢例辭按狀公諱陞字如卿

一字臣宸晚號訥菴先世自常熟遷太倉州曾祖如山贈太僕寺少卿祖浩川公桓明萬曆己丑進士累官巡撫南贛都察院副都御史所至著聲績載在國史父煒給事中贈中大夫通政使司左叅議有七子公行第三少讀書一過目終身不忘與兄給諫公增及諸弟有共硯之風給諫歿撫其子廷銳如子弟孝廉塏早世無後給諫謂公弟多子宜分嗣公毅然辭曰即如是是利弟之死而自私也卒不應弟臺有外侮陰以己貲營救事乃得解卒不令弟知父通叅公歿後遺券可萬金公謂諸

兄弟曰吾家所不足者非財也悉焚之以彰先人之德鄉人誦義焉親黨故人以緩急告輒厚飲助之族人或貧不能葬者倡爲義冢以免暴露家世鼎盛足跡不至長吏之庭州守白君登明循吏也待公以國士終不往見給諫居要路或干以請託正色拒之晚歲仲子通政君給事西掖季子廷銓登進士第守之益力公持身清峻而撝抑如布衣單門晚進與講釣禮諸子旣貴恆以盈滿爲誠以恩讎報復爲可鄙有受恩颺去者卒善遇之其厚德如此通政君爲諫官則述中丞通叅二公家訓

訓之曰毋黷貨賄毋徇情面毋植黨私在西樞勉以寬恤註誤可贖者贖之故通政君令富陽以清白著聞官門下以忠直重朝廷佐西樞以哀矜恩及纍囚皆公教也公好山水尤嗜讀書晚結茅三楹曰靜逸聚書萬卷手自較勘嘗一至富春窮嚴瀨釣臺之勝汎新安江而返癸酉夏吳中大旱公日從州守步禱因致疾通政君在京師聞之請急倍道歸歸三日而公歿遺言以讀書砥行毋交匪類以隳家聲爲訓歿後異香盈室嗚呼公從衆香國中來者非耶生以萬曆丙辰五月十九日亥

時卒康熙三十二年十月十三日酉時得年七十

又八

誥封中大夫通政使司左叅議配楊氏

誥封淑人子男子五人長鏞庠生次即通政君晉  
錫累官通政使司右通政廷銓康熙戊辰進士敷  
錫歲貢生子女子二人一適盛芳節孝被旌一  
適太學生吳隣孫十三人曾孫八人銘曰

婁江之錢肇自海虞奕奕中丞爲國璠璣詒厥  
孫謀播穫菑畲造次仁義被服詩書謙尊而光  
卑不可逾教子一經承德用譽門施榮戟轂列丹  
朱天道福謙影響不誣勒銘堅石永懷德隅

新授文林郎翰林院編修又樸耿公墓誌銘  
館陶耿氏自一白先生明登弘治丙辰進士官監  
察御史抗疏劾逆閹劉瑾直聲震天下累官江西  
叅政曾孫樸公先生如杞復登萬曆丙辰進士官  
遵化監軍副使不拜逆閹魏忠賢祠爲奄黨劉詔  
所劾逮詔獄累官山西巡撫都御史祖孫相望於  
百年之間事具國史而二公干支科第無一不同  
故海岱間言忠孝清門必以耿氏爲稱首中丞公  
子含光官高密訓導實生翰林編修願魯字公望  
亦字又樸生有夙慧襁褓中已識意馬字四歲讀

韻書六歲通經史八歲學右軍書十歲能文章十四補諸生十九以康熙丙午領鄉薦庚戌舉禮部賜進士出身初 廷對擬一甲第三人以一字之誤置二甲改翰林院庶吉士尋授編修公白晳眉目如畫朗然玉山之照人又善詩工楷法尤精國書館閣諸老交引重焉癸丑為會試同考官力絕黃緣焚香籲天期獲奇士以報國首得韓公莢為冠冕已而狀元及第官至禮部尚書餘如徐君倬董君闇繆君錦宣輩皆詞林眉目一時推公知人不減唐之陸宣公宋之歐陽子也未幾假歸

侍司訓公三載會 朝議復設詹事府群公寄書  
敦迫以謂馮翼孝德之選無踰公者且年未三十  
詎可以丘壑終耶司訓公力趣舍人束裝公輦感  
就道非其志也亾何丁父艱歸服闋補原官倡二  
三同志爲詩社益講經濟之學未幾而病語所親  
曰吾所患惟六月過此無慮矣果以六月九日卒  
於京師實康熙壬戌歲也距其生順治丁亥得年  
僅三十有六公性至孝六歲生母張孺人卒哭之盡  
哀丁未公車忽心動急治裝歸而母蔣孺人病革  
人歎其至性里居勸文社手爲丹鉛後進多依以



成名爲詩秀發如初日芙蓉自然可愛有韋齋集  
七卷配蘇氏 新封孺人子男子四人朋舉崔舉雁

舉昆舉子女子一人壻任偉昉孫男六人夢齡嵩  
齡壽平夢平夢賚方平朋舉等以康熙四十四年  
十一月二十四日大葬公於郡城西之先塋銘曰

漢唐百六金虎宮鄰明社淪胥亦維寺人嶽嶽耿  
公世濟忠勁獬廌觸邪繫其天性鍾及文孫芳蘭  
猗猗香難久居秋風悴之天名修文地埋玉樹游  
戲人間電光朝露射書臺畔衣冠所藏卜云其吉  
終焉允臧

無爲州同知黃先生墓誌銘

門人國子司業黃君叔琳孺子門而謁曰叔琳無  
似少無師惟先祖是師凡四之五經之書皆口授  
稍長旁及春秋內外傳史漢唐宋六家之文率手  
錄爲之音訓以授不肖自童子迄弱冠未嘗須臾  
離也而今已矣惟夫子之言質而可信敢以請予  
與司業有一日之長誼不得辭公諱爾悟字穎之  
別字因止其先青州樂安人始祖成以軍功官蓋  
州衛百戶隸籍焉數傳至廷美有二子伯良廕萬  
曆己酉舉人知蔚州仲善廕公考也二公俱以中

丞公爾性貴 皇贈通議大夫巡撫陝西都察院  
右副都御史公之少也值明季喪亂流寓登州之  
寧海又徙濟南始授書中丞初仕爲漢中府通判  
公侍父就養國初中丞以撫定寧夏功 世祖章  
皇帝特簡陝西巡撫已而選內外大臣子弟補環  
衛公與焉尋出爲沅州同知年纔十九至即攝州  
事遭城陷被急縛賊將刺刃不爲屈夜半忽有人  
陰脫之問之曰州民某荷公恩德故冒死來出公  
于難遂跳而免走軍前請大兵恢復丁父艱服闋  
補同知無爲州築泥汙河堤上下四十里役畚鍤

者萬人爲之較遠近均勞逸功成而民不病迄今  
利賴之州人刻石頌德視巢篆除耗羨禁漕費廉  
民疾苦而噢咻之請于督學御史增童子試額士  
皆鼓舞興起於學會大旱步禱而雨人以爲神尋  
請歸養而中丞亦予告一門之內融融如也怡怡  
如也晚歲杜門息機課諸孫丙夜不倦一步趨一嘖  
笑勿敢苟也叔琳旣以康熙辛未 賜進士一甲

第三人及第公勗之曰小子荷 國恩登上第爲  
文學侍從資以進學可也勿矜己而凌物勿自滿  
假而怠於學性儉約耽禪悅衣粗食淡終身不改

其素與人交已然諾自湖南將奔喪太原人馬舜中者贈以金始得歸後訪其家而馬君已前歿登堂拜母倍償其金而去庚辰九月始得疾將易簀索筆書無罣礙無恐怖六字洒然而逝生崇禎四年正月十四日卒康熙三十九年十二月初九日得年七十配李氏 勅封安人子一人華蕃官大城縣儒學教諭 勅封文林郎翰林院編修孫五人叔琳即司業君叔琬順天府庠生叔琪貢生曲周縣儒學訓導叔璫康熙己卯舉人叔瑄曾孫一人元錦叔琬出也銘曰

生亂離享大年詩書之澤以啓後賢高原膺膺松柏丸丸過必式焉曰京兆之阡

新封徵仕郎翰林院檢討玉峰李先生墓誌銘

翰林檢討孫君勳遭其本生考李府君器予往唁之其容深墨充然瞿然杖而後能起予驚曰嘻其甚也吾子之育於孫亦已久矣檢討泣而對曰勳也天下之鮮民而無告者也生我成我恩則均也昔者欲返吾本而未忍遽也今已矣予聞之孔子射於矍相之圃使子路出延射曰賁軍之將亡國

之大夫與爲人後者不入夫爲人後古聖人所不  
禁顧不得與於鄉射之禮何也仁人孝子之心必  
有所怒然而難安者矣今檢討去其所生而育於  
孫一旦遇大故不得爲喪葬主於其心有怒然者  
宜其毀也已而本生妣張又卒檢討述其行泣求  
誌隧道之石予哀其志爰序而銘之君諱文科字  
玉峰其先婺源人始祖實遷長洲之王埭王父奉  
父霆君於霆爲次子少爲儒值天下多故遂廢書  
一日避兵出走前阻水旣渡同行者將斷其梁君  
曰若是是委後來者虎口也力持之梁得不壞僑

居崇明與帕首袴鞬者游其部下有淫掠者誡之  
皆讐伏或見被掠者輒傾橐贖之亂稍定歸郡偶  
過閭門拾遺金坐待移日遲其人還之而二子勸  
勸皆幼慧讀書元妙觀中德州孫公書臺罷長洲  
令居吳見勸器之曰是兒不凡謂君曰君多男吾  
子踰壯無所出曷乞是兒爲吾嗣孫君生之我成  
之不亦可乎孫公廉吏有善政於吳君不忍終拒  
遂許之君念子幼稚乃攜其家至安德寔康熙丁  
未歲也檢討以辛酉領山東解第一乙丑捷南宮  
入翰林君老田間衣大布之衣時與鄰曲故舊話



桑麻卜晴雨爲樂二十七年 覃恩君以例移封  
爲徵仕郎翰林院檢討妻張爲孺人孺人籍太倉  
州有婦德少食貧躬紡績以教子旣貴無態色君  
以四十二年八月就養京師十一月二十三日卒年  
七十七孺人後君厯六月以四十三年四月十二日  
卒年七十六檢討嘗典福建鄉試君告誡甚至檢  
討奉之唯謹故公明爲直省之最檢討以所後有  
子將疏請復姓君持不可乃已歷考君生平行事  
蓋仁人也質直而好義者也其克昌厥後固宜子  
男子四人勲早卒次勲即檢討次勛次劬子女子

二人太倉陳某德州宋來會其適也孫男七人于  
盛壬午舉人于寧于益于謚于璽于盤于監孫女  
六人曾孫一人蘭孫檢討將以某年月日合葬於  
某阡銘曰

橘踰淮兮化枳倚仙李之盤根兮維君有子義山  
蒨施子廣川瀾瀾何必故鄉兮五湖之浹柏爲鬼  
庭兮神其棲止萬祀千秋予君蛻在此

待贈文林郎翰林院庶吉士仲弢何公墓誌  
銘

君何氏諱毓光字仲弢別字魯齋吾邑多著姓而

家法首稱何氏何之先棗強人也有古用者始著  
籍新城數傳至永壽永壽生坤坤生國鼎字中含  
與弟國楨皆以文行重于鄉鄰君中含先生次子  
也少與兄觀光齊名號二何南游武林武林老宿  
皆折節下之歸而以文受知邑令馬君孔懷學使  
者楊君毓蘭咸期以國士旣數踏省門不遇而君  
有子世璠幼有聖童之目以甲子冠其經人謂君  
績學力行坎壈諸生間不于其身而于其子造物  
者豈無意乎而君志迄不衰鍵戶佔畢不改儒素  
丙子受知臨朐令張君曾裕張君浙西名士得君

文擊賞薦領解額尋以一字之誤見擯于主司張君至爲扼腕流涕於是距甲子十餘年矣而君志終不衰然終亦不遇也豈其命耶先是何氏族姓繁中含先生兄弟有憂之於是有睦族之約著爲家訓擇族之老成忠信者爲之長撻罰慶賞仿周禮族師黨正之法少長服教卒爲仁里君兄弟寔左右之縣大夫聞而歎曰盡如何氏邑可臥而治也至今言家法者宗焉君事親從兄終其身內外無間言撫孤姪世琳尤有恩給皆可書元配李氏兩浙運副鴻雷女生於貴介而荆布提汲有桓少

君之風事父母君舅君姑盡孝姑孫母葉皆病往來兩母間視食嘗藥不敢言瘁以勞致疾先其母數日卒宗族稱孝君卒于康熙乙酉閏四月初九日得年五十有九李孺人卒于康熙辛亥十二月二十五日得年二十有五繼王氏子男子三人世璣甲子科舉人內閣中書舍人改署莒州學正世瓚庠生世璿子女子二人適張慶丰焦汝舟孫男四人體仁秉義崇禮綜智孫女二人曾孫女三人以其年十二月二十二日合葬於孝水之南阡蓋君歿四載而世璣登己丑進士第入翰林爲庶吉士

銘曰

老驥伏櫪志在千里志士暮年壯心不已無嗟不遇匪喬伊梓汜鄉之後將復其始

新授徵仕郎中書科掌印中書舍人茂弘蘇君墓誌銘

蘇氏古重黎之後周有忿生爲大司寇邑于蘇城在鄴之西故蘇以趙郡爲望其自充遷武城之鄭口則自子元始也數傳至朝明生君寵君寵生之中游太學以豪俠聞南北齊趙間稱黃中先生有丈夫子六人而中書君最長君諱偉字茂弘一字

濟夫自其少魁梧岸異年十三補博士弟子明年  
食廩餼名壓其儕偶康熙壬子以選拔貢入太學  
乙卯舉順天鄉試辛未始舉禮部成進士癸酉授  
中書科中書舍人順天武闈分考己卯掌科事奉  
命典試湖廣道卒于衛輝旅次君之捷南宮也  
予實爲總裁官榜後識君倜儻奇男子也方期以  
遠大敷歷中外投遺艱鉅必有所表見于世或使  
居言路陪廷議必能區別是非條列時務不苟爲  
突梯脂韋之習而不謂其竟止於此也嗚呼惜哉  
君居家事父母盡孝黃中先生病革謂君曰吾新

文廟惟明倫堂工尚未訖汝畢吾志君泣受命喪  
葬甫竣而明倫堂亦成撫諸弟友愛晰疑送難以  
兄道兼師有昔人易衣共硯之風季弟給事君先  
以丙辰登第有聲諫垣君之教也君久困公車開  
門授徒齊趙間名士負笈牆進率有所成就其子  
姪揃染家訓經術通明拔蝥弧以登者項背相望  
其分考順天武闈得曹曰瑋爲解首明年狀元及  
第其典楚試得彭源等八十人多知名蓋君老於  
文學故以所學遞相授受見于家庭師友間者彬  
彬如此官京師時曹務清簡與翰林素君杜少龐



君雪厓郎中黃君自先諸名流爲詩社文譽藹然  
家居席黃中先生後千里慕義戚族待以舉火者  
甚衆他如立義學造義舫施絮衣棺槨歲以爲常  
比閭尸祝之君得年僅五十有 階徵仕郎官

內府中書科掌科事中書舍人元配李氏繼配張  
氏秘氏治行相望先後如一子男一人廷禮女二  
人婿田肇麗張曰銑以康熙四十四年十月

日葬某阡銘曰

五金之精磐郢湛盧鋒鏑乍試龍津已徂嗚呼  
其命也夫

帶經堂集卷八十六